

四庫全書簡明目錄

〔清〕永瑢等著

四庫全書簡明目錄
下

古典文学出版社

四庫全書簡明目錄

〔清〕永瑤等著

*

古典文学出版社出版

(上海康平路152弄18号)

上海市書刊出版业营业許可証出零捌號

奎記印刷厂印刷 新华書店上海发行所发行

*

書号 123

开本 787×1092 耗 1/32 印张 33 1/4 字数 586,000

一九五七年九月第一版

一九五七年九月第一次印刷

印数 1-5,500 定价(7) 2.80 元

四庫全書簡明目錄卷十四

子部十一

類書類

古今同姓名錄二卷

梁孝元皇帝撰，唐陸善經續，元葉森補。原本久佚，今從永樂大典錄出。所錄同姓名人，雖不及後來余寅諸家之備，然類書之存於今者，莫古於是，故仍錄之以冠首。

編珠二卷，補遺二卷，續編珠二卷

舊本題隋杜公瞻撰。其補遺及續，則國朝高士奇作也。公瞻書宋志著錄，然文淵閣書目不載，士奇稱得自內庫，殊不可信。其中多犯隋諱，尤爲可疑。殆與所補、所續，均一手僞作。以所引皆唐以前書，頗爲古雅，故知其贗而仍存之。

藝文類聚一百卷

唐歐陽詢等奉敕撰。中有蘇味羣、李嶠、宋之問、沈佺期詩，皆後人竄入也。凡四十八門，

以事實居前，詩文列後，在諸類書中，體例最善。

北堂書鈔一百六十卷

唐虞世南撰。北堂者，隋祕書省之後堂，猶未入唐時所作也。凡八百一類。多摘錄字句，而不盡註所出，不及歐陽詢書首尾完具。又原本爲明陳禹謨所竄改，亦非其舊。然所引究多古書，故考證家猶援以爲據焉。

龍筋鳳髓判四卷

唐張鷟撰。其名似乎法家，實則隸事之書。蓋唐制以判試士，故輯以備用也。其書臚比官曹，條分件繫，組織頗工。其註爲明劉允鵬作，意主詳明。而稍傷冗蔓。

初學記三十卷

唐徐堅等奉敕撰。凡三十二部。其例前爲敘事，次爲事對，次爲詩文。敘事雖雜取羣書，而次第若相連屬，較他類書，獨有條理。事對、詩文，採錄亦皆不苟。在唐人類書中，博不及藝文類聚，而精則勝之。

元和姓纂十八卷

唐林寶撰。原本久佚，今從永樂大典錄出，惟闕其卷首國姓一門。其書以唐韻二百六部，

排比諸姓，各載受氏之源，與諸家之譜系，雖不免於附會，而要爲詳賅。

白孔六帖一百卷

六帖本三十卷，唐白居易撰。續六帖本亦三十卷，宋孔傳撰。其合兩書爲一，而析成百卷，不知爲誰。據玉海所載，則宋本已然矣。二書均仿北堂書鈔之例，而傳書稍詳其名。六帖者，唐制帖經，以得六爲通也。

謹案：六帖自合併以後，世遂竟無單行本。然孔傳續白居易書，當以居易書爲主，故今仍以居易之時代爲次。

小名錄二卷

唐陸龜蒙撰。所載古人小名，始於秦，終於南北朝。證以趙希弁讀書附志，已非完書。所錄亦多譌漏，特以其舊本而存之。

蒙求集註二卷

晉李瀚撰，宋徐子光註。瀚書取古人事蹟，類爲四字韻語，以便記誦，皆以對偶成文。子光註雖稍冗蔓，而援引賅博，多所糾正。

事類賦三十卷

宋吳淑撰，併自註。凡一百篇。皆櫟括故實，以一題爲一賦，頗爲簡要。康熙末，華希閔嘗病其未備而廣之。然精博不逮淑也。

太平御覽一千卷

宋太平興國二年，李昉等奉敕撰。凡五十五門。所採書一千六百九十種。雖多轉引類書，不能一一出自原本，而蒐羅浩博，至今爲考據之淵藪，他類書莫能先也。

冊府元龜一千卷

宋景德二年，王欽若等奉敕撰。凡三十一部，部有總序；一千一百四門，門有小序。採摭浩繁，而惟取六經子史，不錄小說。去取特爲謹嚴。舊有音義十卷，爲孫奭奉詔所作，今則佚矣。

事物紀原十卷

宋高承撰。考書錄解題，稱承書凡二百十七事，而此本乃多至一千七百六十五事，非陳振孫所記有謬，卽後人有所竄入也。其書於一事一物，皆考索古書，求其緣起，雖不必盡確，而多可以資博識。

實賓錄十四卷

宋馬永易撰，文彪續補。原本久佚，今從永樂大典錄出。其書採古人殊名別號，彙爲一編。初名異號錄，後彪增廣其書，乃取莊子『名者實賓』之意，改題此名。

書敍指南二十卷

宋任廣撰。

案：文獻通考作任浚，蓋以廣浚儼人而致誤。

皆採掇典籍成語，以備尺牘之用，故以書敍爲名。徵引不免

叢冗，而大抵皆採自本書，不由稗販。

海錄碎事二十二卷

宋葉廷珪撰。凡十六部五百八十四目。閩書稱廷珪聞士大夫家有異書，無不借讀，因作數十大冊，擇其可用者手鈔之，名曰海錄。後知泉州，因取類之。然則廷珪所錄，皆從本書而來，故此書頗簡而有要。

古今姓氏書辨證四十卷

宋鄧名世撰。原本久佚，今從永樂大典錄出。其書以韻隸姓，亦如元和姓纂之例，而考訂譌舛，特爲精核。蓋林寶書以二百日而成，此書則始於政和，成於紹興，父子相繼，積數十年之力也。

帝王經世圖譜十六卷

宋唐仲友撰。原本久佚，今從永樂大典錄出。其書分類纂言，而各系以圖譜，於先聖大經大法，咸綜括貫串，故以帝王經世爲名。其所辨訂，亦皆精確，非空談心法者所能及也。

職官分紀五十卷

宋孫逢吉撰。每官先列周官典章，次敘歷代沿革及居是官者姓名事蹟。採摭頗爲繁富。其名似乎職制，實則隸事之書，故不入史部職官類。猶全芳備祖，雖皆花木故實，而不入農家也。

歷代制度詳說十二卷

宋呂祖謙撰。凡十三門。每門前列制度，敘述簡賅；後爲評說，議論明切。祖謙年譜不載此書，蓋採輯事類，以備答策，本家塾私課之本，轉相傳錄，遂以付刊，非所特著之書也。

永嘉八面鋒十三卷

不著撰人名氏，或曰陳傅良，或曰葉適，莫之詳也。凡提綱八十有八，皆備程試答策之用。主旨不失醇正，亦不至迂闊。信其爲永嘉之學也。

錦繡萬花谷前集四十卷，後集四十卷，續集四十卷

不著撰人名氏。其原本成於淳熙中，書肆輾轉增加，乃下括紹定、端平事蹟。前集凡二百

四十二類，後集凡三百二十六類，續集凡四十七類。所錄雖冗雜瑣碎，多無條理，而所引究多古書。宋代軼事逸詩，所載尤夥。

事文類聚前集六十卷，後集五十卷，續集二十八卷，別集三十二卷，新集三十六卷，外集十五卷，遺集十五卷。

前、後、續、別四集，皆宋祝穆撰；新集、外集，元富大用撰；遺集，元祝淵撰。穆書每類皆始以羣書要語，次古今事實，次古今文集，略仿藝文類聚，其詩文多載全篇，亦復相同。大用與淵，相繼增加，體例皆一無所改。

記纂淵海一百卷

宋潘自牧撰。其分門隸事，與他家略同。惟以天地人物提綱，而天道僅五卷，地理則二十卷，人事則六十四卷，物類又僅十一卷，詳近略遠，詳大略細，與他家體例迥殊。

名賢氏族言行類彙六十卷

宋章定撰。以姓氏分韻排編，而以歷代名人之言行，依姓氏分隸，蓋以譜牒傳記類爲一書也。

羣書會元截江網三十五卷

不著撰人名氏。蓋宋理宗時書肆本。或作元胡助撰者，誤也。凡六十五門，以歷代事實、宋朝事實、經傳格言、名臣奏議、諸儒至論爲大綱，又有主意、事證、時政、散段、結尾諸目。蓋爲程試策論而設。在南宋類書中，僅勝於萬卷菁華。然其中宋代事蹟議論，多史傳文集所不載，存之亦可備參考。

雞肋一卷

宋趙崇絢撰。取古事之相似而不同者，各以類聚，爲後來駢雅同書之祖。類書之別出此格，猶袁樞於史家二體之外，別創紀事本末之一體，後遂亦不能廢也。

小字錄一卷

宋陳思撰。因唐陸龜蒙侍兒小名錄，稍加推廣，並集史傳所載小字以爲一編。存之亦足爲識小之助。

全芳備祖前集二十七卷，後集三十一卷

宋陳景沂撰。前集爲花部，後集爲果部、卉部、草部、木部、農桑部、蔬部、藥部。每部分事實祖、賦詠祖二類。事實與諸書相出入，賦詠則採錄宋詩特詳。後來總集多卽據此爲出典。

山堂考索前集六十六卷，後集六十五卷，續集五十六卷，別集二十五卷

宋章俊卿撰。前集分十三類，後集分七類，續集分十五類，別集分十一類。門目互相出入。大抵此集所遺，即彼集補苴，節節葉葉而成之，故體例頗爲糅雜，亦南宋類書之通弊。至其引據博瞻，考辨精核者，則非南宋類書所及也。

古今合璧事類備要前集六十九卷，後集八十一卷，續集五十六卷，別集九十四卷，外集六十六卷
宋謝維新撰。前集凡六十一門，後集凡四十八門，續集別集各六門，外集十六門。採掇頗詳，惟不載郡縣山川名勝，以視穆方輿勝覽已備也。每門皆前爲事實，後爲詩文。宋代軼事逸篇，往往而在。後集所列宋代官職，尤多史志所未詳，遠在錦繡萬花谷之上。

古今源流至論前集十卷，後集十卷，續集十卷，別集十卷

前集、後集、續集，宋林駟撰；別集，宋黃履翁撰。其書亦備程試之用，而於歷代政治沿革，別目分門，條列件繫，尙有體要。於宋代朝章國典，敘述尤詳。

玉海二百卷，附詞學指南四卷

宋王應麟撰。凡二十一類。本爲詞科而作，故所列門目，率鉅典鴻章，所錄故實，亦多吉祥善事，與他類書體例迥殊。又應麟博極羣書，諳練掌故，徵引奧博，條理通貫。唐宋諸大類

書中，杜佑通典可以抗行；馬端臨以下，皆非其敵也。舊附刻書十三種，惟詞學指南，原附書末，今仍存其舊，而其餘則別著錄焉。

小學紺珠十卷

宋王應麟撰。分門隸事，與諸類書略同。而每門之中，以數爲綱，以所統之目，繫於數下，其例始自陶潛四八目，應麟取以類事，遂爲規格。張九韶以下，皆沿其餘波者也。

姓氏急就篇二卷

宋王應麟撰。仿史游急就篇體，以姓氏聯貫成章，取便記誦。文詞古雅，亦不減於游。惟篇中複姓如申屠，不能避申字屠字之類，其餘單姓，皆無一字重見。其註亦應麟自作，援引證明，皆一一典核。

六帖補二十卷

宋楊伯昂撰。凡二十門，皆補白居易、孔傳二書之遺。二書所有，卽不複見，故所採未能繁富。其故實或不註出典，亦沿白居易之例也。

翰苑新書前集七十卷，後集上二十六卷，後集下六卷，別集十二卷，續集四十二卷

不著撰人名氏。舊序但稱爲宋人刻本，題謝枋得者，妄也。前集皆備書啓之用，後集上皆

備箋表之用，後集下爲類姓，而補前集未備者三門，別集皆錄宋人箋表之類，續集皆錄宋人書啓之類。大例以前集、後集載事，別集、續集載文也。其書雖爲應酬而作，而於宋代典故文章，頗資考證。

韻府羣玉二十卷

元陰時夫撰，其弟中夫註。以韻隸事，始於韻海鏡源。然其書不傳，傳於今者，以此書爲最古。今韻稱劉淵所併，其書亦不傳，世所通行之韻，卽從此鈔出，錄之以著韻府及詩韻之所始焉。

純正蒙求三卷

元胡炳文撰。炳文以李瀚蒙求，多以對偶求工，不盡有關於法戒，因別作是書。上卷敘設教明倫，中卷敘立身行己，下卷敘待人接物。每卷一百二十句，併自爲之註。

排韻增廣事類氏族大全二十二卷

不著撰人名氏。所述事蹟，迄於宋末，蓋元人所作。其書以韻隸姓，以姓統人，與章定名賢氏族言行類纂，體例相同，而互有詳略，是以並存。

名疑四卷

明陳士元撰。於古人姓名異字、更名更字與同姓名者，上起三皇，下迄元代，一一援據諸書，分條臚載。雖嗜博好奇，閒傷駁雜，其博瞻要不可沒。

荆川稗編一百二十卷

明唐順之撰。其體例略仿章如愚山堂考索，而大旨欲無所不該。故門目浩博，始以六經，六經所不能括者，條列以九流之學術，凡爲類二十有七。終以六官，六官所不能括者，賅舉以歷代史傳，凡爲類二十有五。順之沒後，頗爲茅一相所竄亂，故瑕類在所不免。而蒐羅宏富，要足爲漁獵之資。

萬姓統譜一百四十六卷，附氏族博考十四卷

明凌迪知撰。其書亦仿章定氏族言行類彙，而蒐羅較廣，其龐雜牴牾，亦以驚廣而生。以世俗之所通行，故亦存備參考焉。

喻林一百二十卷

明徐元太撰。採古人設譬之詞，分類編輯，凡十門五百八十餘子目。其體例爲古所未有，其徵引古籍，具列書名，又仿資暇集、演繁露之例，併註其篇目卷第，尤明人之所不能。

經濟類編一百卷

明馮琦撰。其以琦手彙刪定排纂，分爲二十三類者，琦弟瑗及琦門人周家棟、吳光儀也。大致仿冊府元龜，而彙錄文章，體例小異，惟道術、物類二門，頗爲蕪雜，是瑗等刊削之無法矣。

同姓名錄十二卷，錄補一卷

明余寅撰，周應賓補。梁元帝同姓名錄，明代已無傳本。寅因補撰爲四卷，應賓謂其未備，爲補一卷，寅復自補爲八卷，與應賓書共爲一編刻之。二人爭相摺拾，不免泛濫，然亦賅博。

說略三十卷

明顧起元撰。其書摘錄說部，分門編次，但纂言而不記事，與徐元太喻林相近，剪裁鎔鑄，頗爲條理分明。

天中記六十卷

明陳耀文撰。以所居近天中山，因以爲名。明代博洽推楊慎，起而與之爭者，惟胡應麟與耀文。故所輯類書，終較有根據，閒附辨證，亦類書之所無。世所行本五十卷，此刻獨六十卷，乃晚年所定足本也。

圖書編一百二十七卷

明章潢撰。取古人左圖右書之義，裒輯諸圖，係以論斷。凡經義十五卷，象緯歷算十三卷，地理三十九卷，人道六十八卷，附以易象、類編、學詩、多識各一卷。引據古今，詳賅本末，遠在王圻三才圖會之上。

駢志二十卷

明陳禹謨撰。取古事之相類者，對偶標題，而各註其事於條下。大抵與方中德之古事比，大致相近而博贍則勝之矣。

山堂肆考二百二十八卷，補遺十二卷

明彭大翼撰。凡四十五門，大抵薈粹類書而成，非伐山自作。編次亦未免蕪雜，然包括羣言，取材終富。

古儷府十二卷

明王志慶撰。皆取六朝、唐、宋駢偶之文，採摭英華，分類編載。凡十八門，一百八十二子目。或錄全篇，或取節本，如藝文類聚之例，皆採自本書，不同割裂餽飭，迷其所出。在明人類書中，猶爲具有根柢者。